

德園杭城羣勸早避婦曰苟延人世十有餘年今得死所以避爲及園急命十齡嗣子跪於梁貴儒之前曰爾爲汪氏三世老人家人今以此宗子付爾爾可挈之河南交其本生父母鞠育教誨倘爲寇氛所阻不得達爾其撫諸言畢偕適孫氏之堂姑與甥女阿敏僕婦陳氏同至後園空屋投繯而死翼日寇至其所歎曰何其烈也詢姓氏于守者喚其解繯三月初三日夫弟曾唯曾復隨張營入城收尸以殮葬于曾撰之墓梁貴儒亦偕繩年回其叔撫養于家明年十一月城再破又死于難今以曾事之子鼎年爲後

汪氏小宗譜卷五目

文宇公傳略

淑佩公傳略

公聘公傳略

育青公傳略

定遠公傳略

澹庵公傳略

魚亭公傳略

春園公傳略

小米公傳略

文宇公傳略

海昌陳世倌撰

公諱元台字文宇姓汪氏居黟邑之宏村公生而穎異氣宇凝重雅嗜書史後以厥考妣春秋高遂仔肩家政絕意進取業鹺於浙卜居錢塘焉惟是鹺之爲業利廣而用繁且日與官爲市往往易涉侈靡公獨辭豐就約一切甘食鮮衣卻之弗御處事明斷有功於鹺務不少以故爲同事所推重至於敦本睦族尤出自至性念遷杭以來邱隴俱在故土歉然於中歲或一再往必躬親祭奠瞻支祠正儀堂棟宇崔巍前人營構維艱命子若孫捐田畝以備不時修理迨後賢嗣輩出家聲日振優游於六橋三竺閒歲已卯以展墓歸里門遂遭疾卒其孫時英覓地於

湖山得吉壤奉公柩暨配孺人葉氏柩來杭合葬於靈隱之龍門山并捐祠田若干畝永供歲脩之需遵遺命繼祖志也
論曰君子之所以失其身而令譽不彰者皆由外重而內輕也如公之席豐履厚能澹泊靜遠以養其天仁孝誠敬以篤其志雖未概其生平亦可以見其大凡矣昔太史公於晏子嘗願爲之執鞭吾於公也亦然

淑佩公傳略

嘉興錢陳羣撰

公姓汪氏諱宗紳字淑佩號純菴其先黟人考文宇公始徙家錢唐公性孝友事兩尊人愉色婉容先意承志務盡力以樂其心析產稟命伯兄有無多寡肥瘠置不較也居家有禮法每旦起正襟危坐子弟勝衣以上以次問安規矩疊肅若朝典歲時飲酒一堂四世獻酬沃洗之暇訓以祖宗勤儉遺事聞者悚聽勤於睦族有以急難告者傾囊濟之無所吝與人交樂易坦白不設城府而是非可否之介屹然如山嶽之不可奪公弱冠補諸生雖未及從官顧以矩言楷行爲鄉里祭酒壽七十有八以次子時英貴封承德郎兵馬司指揮

舊史氏曰古今論家法者以萬石君爲首史稱其孝謹聞郡國
齊魯諸儒質行所不及昔王右軍東游還欲教養子孫敦厚退
讓以彷彿萬石之風余讀其與謝萬書輒心嚮往之若汪公者
可謂有醇德而能教於家者矣子姓彬彬
恩綸寵賁詎偶然哉詎偶然哉

公聘公傳略

公諱如珍字公聘淑佩公子也生而純孝稍長能怡然養志父
母奇之年十四居母喪哀毀幾滅性服闋補博士弟子員浸灌
磨礪文翰端麗銳欲以科名自奮潛心經學所撰錄盈尺一時
名公巨卿皆驚歎以爲國器已而試於鄉不售下帷攻苦遭疾
卒年僅二十娶於吳無子以同產子鎮爲後

育青公傳略

公諱時英字育青號素菴淑佩公之仲子也承先人業以鹽筴轉輸於浙遂家錢唐少習舉子業由諸生授兵馬司指揮以祿不逮養辭惟兢兢以承先啟後爲己任葬先人凡三世皆重跡深谷運畚畱營窳必躬必親雖大寒暑不敢告勞飭身敦行以約不以侈以勤不以怠厥後見鹺業用廣費繁恐子弟輩漸習奢侈遂棄弗務以歲入之羨建支祠捐祀產婚親族之爲人後者弭閭巷之啟爭端者惠不形於色言必信於心崇孝義重根本孜孜不倦至於今徽杭兩州稱盛德君子焉

定遠公傳略

公諱鎮字定遠號蓮峯育青公舉丈夫子四公其長也以序出
爲公聘公後生有異稟未弱冠補諸生以明經需次學博性至
孝事親盡色養撫諸弟友愛兄道兼師閨門之內怡怡如也育
青公好善樂施爲族黨引重於諸子中獨器公遇事必呼以爲
助公氣度宏遠汪汪若干頃陂至於析義利臨事會如斬亂絲
盤錯無以雜佐育青公勸支祠置祀產綜理曲折無不中度族
姓皆服其公居里閭之間恭大慈小履順考祥善行不可殫紀
有子世昌教以讀書修行爲君子儒公之卒也年止四十卒後
部選得慶元訓導

澹菴公傳略

公諱世昌字占五號澹菴生而穎敏稍長閉戶力學博知古今
在諸生中不屑事俗儒章句以道義名節自勵弱冠居父喪哀
毀盡禮事母夫人至孝朝夕定省寢門疾痛苛癢不去左右雖
年六十餘猶孺子也從父三人叔季早世皆無後公卜以葬歲
時享祀弗替仲父歿諸弟皆年少公撫愛甚篤過於同產人以
爲難汪氏之在新安者舊有支祠前人創造未竣捐資千餘金
落成之堂構聿新輕財好施中外姻戚待以舉火者數十家婚
喪緩急皆賴焉爲人清真簡遠濯洗雕飾望之如晉宋間人然
言動必遵古禮於書無所不讀湛於經學旁及子史百家涉流

探源辨晰純駁靡不淹洽貫穿奉母之暇晷矻矻箋纂久之所得益邃晚年翛然三徑彈琴賦詩雲情霞思迴絕町畦於聲勢泊如也有子二人孫男五人教以讀書修行足世其家卒年六十有三以長君履泰貴贈儒林郎光祿寺署正

魚亭公傳略

嘉興錢陳羣撰

君諱憲字千陂號魚亭先世居上江黟縣之雷岡七世祖文宇公始遷於杭貫錢唐考朝議公諱光豫字介思妣施太恭人以君貴受封君天性純孝幼偕弟容谷侍兩親不甞離左右弟早世服勤益專摯未冠補諸生出予同年宗伯鄧公東掌門公司衡兩浙文行並重特器君逾年登甲子賢書乙丑聯捷爲予主試南宮所得士榜後來謁儔眾中德器溫純予尤愛重之顧年少澹於榮進南歸侍養者十五年戊寅赴京以資補刑部陝西司員外郎奉職勤慎明年以父母俱週甲復請急歸自是一意循陔無復出山志矣里居定省暇與鄉黨習接退然常若不及

未嘗言人小過人有一善輒極口獎成之尤樂緩急人知交中有匱乏者不待其請每先事周之凡嫁娶不以時喪葬不能舉事畜之艱窘行理之乏困者無論戚疏皆量力資給之無德色無勸容雷岡族屬既繁君躬詣祖祠謀諸宗長勸捐義田以成父志耽蓄書丹鉛多善本求售者雖浮其直不與較集同志數人昕夕討論經史疑義詩文不多作必精詣一字未當往往沈想經時必愜意始脫稿歲庚寅夏五朝議公邁疾君侍疾過勞及疾革哭踊過毀食糲服苴逾期不變制君居恒自奉澹薄體素羸至是僅以骨立明年施太恭人抱疾幾危君悸甚苦次強起多方療治病少痊而君遂嬰疾不起卒以辛卯八月九日

年五十有一君遊予門將三十年予懸車以前還往亦不數數晚始熟君之爲人蓋篤行淳備而誼敦在三者歟回憶西泠文酒之娛與君父子杖履周旋曾不數年相繼淪逝不自知其重哀而累歎也君諸子並有文庶幾能振其緒冢子汝琛以京秩邀

恩晉贈君官踵門涕洟請爲之傳因次君行實如左

論曰晉傅元論孝謂內盡其心以事親外崇禮讓以接物孝子仁人君子之儀表也又曰存盡其和事盡其敬亡盡其哀予於潁昌侯見之矣陳謝貞哀毀羸瘠尚書右丞徐祚左丞沈客卿俱來候貞愴然歎息徐喻之曰弟年事已衰禮有恒制小宜引

割自全貞因感慟祚謂客卿曰信哉孝門有孝子客卿曰謝公家傳至孝此恐不能起如何今汪君終身孺慕不忍須臾離親卒以毀殉苟何謝貞殆其人也予嘗察其生平家稍裕好施而自養儉薄名挂朝籍對人嘗抑然自下學富典墳而貌益樸訥生長吾浙而齊魯質行諸儒有所不及孰謂斯人而不永其年康成三命之說其信然耶

春園公傳略

仁和沈亦然撰

君姓汪氏諱璐字仲連號春園晚年又自號九一翁世居徽州黟縣之雷岡八世祖曰文宇始遷杭貫錢塘五傳至君祖曰光豫生二子長憲字千陂乾隆乙丑進士官刑部員外郎次寬字容谷國學生千陂公四子君其仲也容谷公早世無傳遂以君嗣遭嗣母施之喪年財十八哀毀如禮焉時君大父母本生父母均在堂君惟下帷績學年二十五補博士弟子員迨重蔭繼傾家巨事百端叢君擘畫之餘賄不玷精是以家更良奧而學亦日進歲丙午舉於鄉三上禮闈報罷以例授太常博士會得肝脾疾藥衰關身而壬子甲寅從子阜子誠相繼領鄉薦君以

後起有人自是遂杜門養病不復出矣子誠觀政刑曹君馳書諭之曰汝未讀律遽爲刑官周內重比其戒之又曰西曹定獄生死攸關須悉心商榷毋輕畫諾也旋促歸以家事付之君於屋後隙地種樹疊石架矮屋數間於中淪茗焚香以彈琴讀書爲適喜臨前人法帖不必貌肖而神韻彌似性嗜山水春秋佳日輒與昆弟子姓或二三契友爲湖山之遊曠如奧如各攬其勝慕富春山水鼓枻而遊者半月其逸致如此天性孝友於木本水源尤爲先務之急三世兆域躬偕葬師往來山中再三相度而定與伯兄及叔季雖各闢門戶而怡怡之情白首無間師友親弗或蘇其枯茆或飲其婚葬挾盛願來無不各副所願而

去生平嗇於自奉食無兼味衣無華鮮出則以安步當車迨老年腰腳衰輒亦未嘗無徒行時家人等苦諫不聽也待人惟以誠信不爲逆億不談人短卽臧獲廝養亦曲諒周至不過爲督責故卒之日皆行哭失聲君生於乾隆十一年丙寅六月初八日卯時卒於嘉慶十八年癸酉二月十五日巳時春秋六十有八乾隆丙午科舉人

敕授儒林郎

晉封奉直大夫配范氏

敕封安人

誥贈宜人先君四年卒合葬於橫山桐鳴之麓子一人誠甲寅

科舉人刑部江西司主事孫六人遠孫迺孫邁孫迺孫迪孫述
孫所著有松聲池館詩鈔所輯有真珠船酈注藻等書藏於家

小米公傳略

仁和胡敬撰

吾鄉自杭厲後績學能文有稱於時者不多見獨山舟學士以
翰墨名動四裔餘事發爲詩古文辭繼以曜北處素兩先生經
史各名家兼通聲韻之學其所自出能成梁氏宅相而以著述
聞者羣推吾友汪君小米馬君名遠孫字久也系出安徽黟縣
世居縣之宏村十世祖文宇公諱元台始遷錢塘曾祖容谷公
諱寬早世本生曾祖干陂公諱憲乾隆甲子舉人乙丑進士官
刑部陝西司員外郎祖仲連公諱璐丙午舉人官太常寺博士
父孔皆公諱誠甲寅舉人官刑部江西司主事母梁宜人文莊
公會孫女冲泉少司空孫女處素孝廉女也君幼聰穎十歲遭

梁宜人喪侍祖父受經能通大義嘉慶甲戌入郡庠孔皆公督課嚴命寄居中表孫午泉大令家偕午泉攻舉子業夜漏未盡輒篝燈起讀如是者二年丙子舉於鄉兩赴計偕循例爲內閣中書戊寅在京待銓聞父疾歸里逾年孔皆公捐館君銜哀風木遂絕意進取而肆力於著書先是千陂公性耽書插架多善本甲乙編排丹黃半所手定吾鄉藏書家若趙氏小山堂吳氏瓶花齋杭厲輩所借觀賞鑒者今皆散佚不存惟振綺堂所藏歸然具在孔皆公以君之嗜學也病中指楹書示曰他日以畀汝君著書務爲根柢之學排日讀十三經注疏以心得者輯爲考異又以抱琴堂釋文本尙多譌闕欲爲補正功雖未竟其宗

尙可概見矣著述之暇與同里著彥結東軒吟社凡爲歲十爲集百薈萃所作且繪爲圖於湖濱起水北樓春秋佳日棲息其中勘經之餘焚香晏坐時復登山臨水寄其曠逸之情因自號曰借閒漫士吾鄉志乘以南宋咸淳臨安志爲最古君重雕以廣其傳他若厲樊榭遼史拾遺東城雜記梁處素左通補釋汪選樓三祠志俱次第梓行以及亡友詩文代爲校栞者更難悉數事繼母姚以順率諸弟以端待戚黨以厚方孔皆公棄養時君年甫二十六五弟一妹皆幼友愛備至爲擇姻舊家十八年來婚嫁咸畢治家遵祖父遺訓豐約得中不染習俗流弊重然諾見事明決與人交以至誠貧者感其施饒裕者亦倚以定是

非可否易簀之日里中士大夫無親疎遠邇皆咨嗟太息且有泣下霑襟者娶於梁爲萊子教諭女生子一曾撰女五而梁孺人歿篤於伉儷鰥居五載以內顧事冗不獲已繼娶于湯爲醴泉茂才女未踰年又以瘵歿副室李氏生女一君卒於道光丙申五月八日年四十三所著有詩考補遺國語考異發正古注漢書地理志校勘記借閒生詩詞配梁孺人著有列女傳校注湯孺人著有玉臺畫史半爲君所訂正云

論曰余官京師時卽聞君名癸未歸田得與君締交暨丙申歲星更始矣余齒長於君二十餘歲旣老且病閒有所作方謂異時當賴君訂定不圖君之先我辭世也余里中所交友凡通話

訓擅詞章者前後無慮數十輩至晨夕晤聚殷嚮往而深知性情者始則汪選樓家禧繼則陳扶雅善最後惟君耳選樓學博而志銳力欲抗衡古人於詩不多作扶雅明易學工古文辭詩詞亦非所長能兼而有之者君也今選樓墓木已拱幸君梓其遺編以行於世扶雅之歿後君祇半載餘所著晉書已垂成君獨未及與爲商摧惜哉君旣承梁氏兩世學此二人亦素爲山舟學士所稱而又皆爲君所推重者志合道同故連類及之嗟乎以君之處境與君之學之才倘得及余年其著述當不讓杭厲何天故靳之俾造誼止於是耶然其所造詣根柢深厚非泛鶩家所能窺測余證其必傳於後無疑也